

Estensaun Estadu Emerjénsia ba Datoluk, Sei Konsentra De'it Iha Aspetu Tolu



Parlamentu Nasionál Autoriza ho Votu A Favor 40

Dili, 27 Maiu 2020: S. Exa. Primeiru-Ministru Taur Matan Ruak afirma, estensaun Estadu Emerjénsia ba datoluk ne'e, sei relaxa liután tanba sei konsentra de'it ba aspetu tolu (3) importante, hanesan limitasaun sirkulasaun internasionál, liberdade sirkulasaun no direitu rezisténsia.

“Pedidu ida ohin halo, para halo estensaun maibé hanesan mós iha mensajen husi S.E Prezidente Parlamentu nian katak ita konsentra liuliu ba iha aspetu tolu de'it, ne'e signífika katak parte hotu-hotu ne'e ita relaxa, se señores deputadu sira akompaña medidas de implementasaun ba Estadu de Emerjensia ba dala rua, iha primeira faze ne'e ami maka'as uitoan, segunda faze ne'e ami relaxa uza prinsípiu ida proporsionalidade i progresividade relaxa, i ba terseira faze ne'e ami hakarak relaxa liu tan, porezemplu misa sira bele kontinua, eskola sira haree possibilidade desde que tuir regra sira hotu ne'ebé iha, atividade ekonómika bele lao filafali mas liuliu konsentra ba iha medidas ne'ebé duro, ne'e sei konsentra ba iha aspetu tolu; ida mak sirkulasaun internasionál ne'e signífika katak liga ba ita-nia fronteira sira, segundu mak liberdade sirkulasaun, katak laiha limites tanba tenke fó kapasidade ba ita atu kontrola no karik iha nesesidade ita bele endurecia ho medidas restritiva liu tan, terseiru maka direitu rezisténsia ne'e konsentra ba iha aspetu tolu ne'e de'it”, esplika Xefe Governu ba Membro Parlamentu sira, kuarta-feira ne'e iha debate estensaun Estadu Emerjénsia ne'ebé Governu solisita ba Prezidente Repúblika hodi husu Parlamentu Nasionál nia autorizasaun.

Liután Xefe Governu esplika Timor-Leste uza sistema portugés iha Konstituisaun no rejime jurídku sira, katak atu limita sidadaun sira-nia direitu ne'e só ho Estadu Emerjensia ka Estadu Sítio, mak Governu ka Estadu bele limita sidadaun sira-nia direitu, se la ho ida ne'e mak viola Konstituisaun artigu 42 kona-ba liberdade sirkulasaun sidadaun sira-nian

“Pratikamente ita uza sistema portugés ba iha ita-nia konstituisaun no rejime jurídku katak limita ema nia direitu ne'e só ho Estadu Emerjensia, sem ser ida ne'e interpretasaun konstituisaun ne'e ho lei sira ne'ebé restritiva ne'e la'ós pasivu liu tanba ne'e mak tuir ita-nia konstituisaun hateten katak só ita limita direitu ema nian em kazu de ita dekreta Estadu de Sítio ou Estadu Emerjensia i nesse caso ita hili Estadu de Emerjénsia”, hatutan Xefe Ezekutivu.

Entretantu hafoin rona tiha esplikasaun hosi Ekipa Sala Situaun-Sentru Integradu Jestaun Krize (SS-CIGC) no Primeiru-Ministru, no rona tiha preokupasaun sira hosi deputadu sira, ikus mai Parlamentu Nasionál fó autorizasaun ba estensaun ho votu a favor 40, kontra 1 no auzente hosi Deputadu sira Bankada CNRT na'in 21, UDT/FM na'in 2 no PUDD na'in 1.

Estadu Emerjénsia datoluk ne'e sei hahú vigor iha loron 28 fulan Maiu oras 00h00 OTL no sei termina iha loron 26 fulan Juñu 2020, enkuantu Estadu Emerjénsia ba daruak sei hotu iha loron 28 fulan Maiu oras 00h00 OTL.